

«El era in animatur d'emprima classa»

Cuira: Vernissascha dal cudesch da Tista Murk

DA GION NUTEGN STGIER / ANR


«Senza el fissan nus oz betg uschè elevant»

■ **Gist frestg or da la stamparia è il cudesch deditgà al pli grond pionier dal radio e televisiun, al reschissur da teater fitg popular ed a l'autur e scribent enconuscent. Tista Murk, ina personalitad singulara ed in um che ha realisà sias visiuns sco paucs auters Rumantschs.** Ina societad illustra è sa radunada en il «Auditorium» da la Banca chantunala per assiter a la vernissascha dal cudesch «Tista Murk – Mussavia e pionier rumantsch». Per l'edizium da quel segnan la Chasa Jaura e La Lia Rumantscha en collavuraziun cun la Somedia SA che ha stampà il cudesch, deditgà a Tista Murk, che avess gè ils 15 d'avrigl 100 onns. Ils Jauers «Arno ed Aldo» han dà l'en-tschatta a la vernissascha cun intginas chanzuns, cun texts da la plima dal grond promotur dal rumantsch, dal radio e da la televisiun e dal teater. Deplorablain ha ja el betg gè l'onur d'enconuscher personalmain Tista Murk, ha ditg *Urs Cadruvi*, il secretari general da la Lia Rumantscha, en ses pled da bainvegni. «El è stà in um che ha muventà ed er provotgà, savens er i sur cunfins e lura fatg punts tranter la gliued», ha punctuà Urs Cadruvi.

Ils preschents han lura er laschà plaschair il film d'*Arnold Rauch* che la Televisiun Rumantscha ha fatg en regurdientscha al grond pionier da radio e da televisiun. A pled è er vegnì tar la vernissascha *Oscar Knapp*, il president da la SRG.R. «Senza sias visiuns e senza sia cumpetenza sociala fissan nus oz betg uschè elevant», ha ditg Oscar Knapp en ses pled. Da sia persvasiun da realisar visiuns sappian er anc oz emperder bliers, ha ditg il president da la SRG.R, Oscar Knapp. A Tista Murk haja nagin gè da dir tge quel haja da dir e tge quel haja da far cun el esser persvas da sias visiuns.

Valurs nunpajablas per la SRG

Drizzà plets simpatics a la raspada illustra ha lura er *Raymond Loretan*, il president da la SRG.SSR. Tista Murk haja rut barrieras tranter ils idioms, las regiuns e las confessiuns, ha ditg il Vallesan. L'um dal radio e da la televisiun haja gè in agen dun per far punts tranter las regiuns linguistas en Svizra e Tista Murk haja er vivì quai che la SRG.SSR, saja oz, in servetsch public. Grazia ad el saja stà pussaivel da resentir la Svizra rumantscha er en las autras regiuns



Ils dus figls da Tista Murk cun il collavurator da la Lia Rumantscha: Schimun Murk, Mario Pult e Jöri Murk (da san.).

da noss pajais, ha ditg Raymond Loretan. L'um da la Val Müstair haja gè per la SRG valurs nunpajablas.

«El fascheva chaussas che nagin fascheva»

Iso Camartin è in dals 15 auturs che ha scrit gugent e cun plaschair ils texts plain tensiun per il cudesch «Tista Murk – Mussavia e pionier rumantsch». Ses amè Tista Murk saja stà in animatur d'emprima classa, in visionari e cunzunt ina persuna cun ina particularitad sco paucas autras. Far chaussas che nagin fascheva, far là ina via nua ch'è dava anc nagina, quai fascinava Tista Murk di per di en sia professiun. «Curaschus, gagliard e filosof», quai era Tista Murk, ha ditg Iso Camartin en ses pled impressiuant e singular. Sia vita, sias emissiuns eran entusiassem e plaschair da la vita e quels aspects transfurmava Tista Murk

er sin las autras persunas, ha ditg Iso Camartin. «Gaudium vitae», quel aspect gaja bain a pèr cun il pionier da radio e televisiun, cun vesair el la vita sco in vair divertiment. «Er war ein Manipulator uneres schlafenden Entusiasmus», ha manegia il co-autur dal cudesch, Iso Camartin. Ultra da quai saja Tista Murk propi er stà in svilupader per il plaschair da la vita, ha ditg Iso Camartin cun in surrir. A la fin da la vernissascha ha *Mario Pult*, il collavurator da la Lia Rumantscha e l'um ch'è stà responsabel per la producziun dal cudesch, preschentà quella edizium scritta en rumantsch e tudestg. Inromà l'occurrentza musicalmain ha la Compagnia Rossini e quai cun intginas muettas da l'opra «La Raieta», tenor in libret da Tista Murk e messa en notas da *Claudio Simonet* e fin oz anc mai stadas publicas.



La Compagnia Rossini ha embelli la vernissascha cun intginas chanzuns da bellezza, tenor in text da Tista Murk e mess en notas da Claudio Simonet.

FOTOS G. N. STGIER